

Umiarsuarni angallatinilu atortut pillugit teknikkikkut maleruagassat pillugit nalunaarut

Imarsiornerup isumannaatsuunissaanik inatsimmi §§ 3-4 aamma § 32, takuuk inatsimmik nalunaarut nr. 903, 12. juli 2007-imeersoq, imarsiornerup isumannaatsuunissaanik inatsisip Kalaallit Nunaanni atuutilerneranik peqqussutikkut nr. 882, 25. august 2008-meersukkut atuutilersoq, naapertorlugu Kalaallit Nunaanni Namminersornerullutik Oqartussat isumasioreerlugit piginnaatitsissullu malillugu aalajangersarneqarput:

§ 1. Maleruagassami pineqarpoq Siunnersuisoqatigiit umiarsuarni angallatinilu atortut pillugit malittareqqusaata 96/98/EF 20. december 1996-imeersup, Kommissionip malittareqqusaatigut 98/95/EF 11. november 1998-imeersukkut, Kommissionip malittareqqusaatigut 2001/53/EF 10. juli 2001-imeersukut, Kommissionip malittareqqusaatigut 2002/75/EF 2. september 2002-meersukkut, Europa-Parlamentip aamma Siunnersuisoqatigiit malittareqqusaatigut 2002/84/EF 5. november 2002-meersukkut aammalu Kommissionip malittareqqusaatigut 2008/67/EF 30. juni 2008-meersukkut allangortinneqartup, naammassineqarnera.

Imm. 2. Umiarsuarni angallatinilu atortut pillugit erseqqinnerusumik malittarisassat maleruagassami ilanngussatut naqiterneqarput.

§ 2. § 1-imik unioqqutitsinerit akiliisitaanermik imaluunniit ukioq ataaseq parnaarussaanermik pineqaatissiissutigineqassapput.

Imm. 2. Pillaaneq ukiut marluk angullugit parnaarussaanermut sivitsorneqarsinnaavoq,

- 1) unioqqutitsinerimi inuunermik peqqissutsimilluunniit ajoqusiisoqarpat imaluunniit tamatumunnga navianartorsiortitsisoqarpat,
- 2) assinganik assingusumilluunniit unioqqutitsinerimi inerteqqummik naalakkiummilluunniit siusinnerusukkut pineqaatissiisoqareersimappat, imaluunniit
- 3) unioqqutitsinikkut unioqqutitsisoq allalluunniit aningaasatigut iluaqutissarsippata iluaqutissarsiniarneqarsimappalluunniit.

Imm. 3. Unioqqutitsinerimi iluanaarummik pissarsiarineqartumik arsaarinnittoqanngippat, akiliisitsinerup annertussusilernerani, tamatumani aamma ilassummik akiliisitsinerimi,

aningaasatigut iluaqutissarsiat imaluunniit pissarsiat annertussusiat immikkut eqqarsaatigineqassaaq.

Imm. 4. Ingerlatseqatigiiffiit il.il. (akisussaassuseqarfiusut) pineqaatissiisarneq pillugu inatsimmi kapitali 5-imi malittarisassat malillugit pineqaatissinneqarsinnaapput.

§ 3. Pisimasoq imarsiornerup isumannaatsuunissaa pillugu inatsisip Kalaallit Nunaanni atuutilerana pillugu peqqussummi pineqartunut ilaappat, Kalaallit Nunaanni pinerluttulerinermi inatsit naapertorlugu pineqaatissiisoqarsinnaavoq.

Imm. 2. Pissutsit § 2, imm. 2-mi taaneqartut sukannererusumik pineqaatissiinissamut tunngavissatut isigineqassapput.

Imm.3. Iluanaarummik, pinerluttulerinermi inatsimmi § 116, imm. 1 naapertorlugu, unioqqutitsinermi pissarsiarineqartumik arsaarinnittoqanngippat, akiliisitsinerup annertussusilernerani, tamatumani aamma ilassummik akiliisitsinermi, aningaasatigut iluaqutissarsiat imaluunniit pissarsiat annertussusiat immikkut eqqarsaatigineqassaaq.

Imm. 4. Ingerlatseqatigiiffik il.il. (akisussaassuseqarfik) unioqqutitsippat, akisussaassuseqarfik akiliisitaanermik pineqaatissinneqarsinnaavoq. Naalagaaffik, Kalaallit Nunaanni Namminersornerullutik Oqartussat, kommunit, kommunip ataatsimoorussiffia, kommunalbestyrelsit, nunaqarfinni aqutsisut il.il. pillugit inatsisartut inatsisaanni § 64-imi pineqartunut ilaasoq, unioqqutitsippat, pisortat oqartussaaffiat pineqartoq akiliisinneqarsinnaavoq.

Imm. 5. Pineqartoq Kalaallit Nunaanni najugaqanngippat, imaluunniit inuiaqatigiinnut kalaallinut attaveqarnera aalajangersimasuunngippat, pineqaatissiinissaq tunngavissaqarani, suliaq Danmarkimi suliaannngortinneqarsinnaavoq imaluunniit Danmarkimi malersugassatut innerssuunneqarsinnaalluni.

§ 4. Maleruagassaq 21. juli 2009-mi atuutilerpoq.

Imm. 2. Umiarsuarni angallatinilu atortut pillugit teknikkikkut maleruagassat nr. 12, 2. december 2002-meersut atorunnaarsinneqarput.

Imm. 3. Atortut ilanngussaq A.1-imi ”atortup taaguutaa”-ni ”nutaaq”-tut oqaatigineqartut imaluunniit ilanngussaq A.2-mi ilanngussaq A.1-imut nuunneqartut, aamma 21. juli 2009 nallertinnagu sanaat, typit akuersissuteqartarneranni periuseq naapertorlugu, naalagaaffimmi ilaasortaasumi ulloq taaneqartoq nallertinnagu atuutereersut, ulloq taaneqartoq

aallarnerfigalugu EU-mi umiarsuarmut angallammulluunniit tuniniarneqarsinnaapput
ikkussuunneqarsinnaallutillu.

Søfartsstyrelsen, ulloq 1. juni 2009

PER SØNDERSTRUP

/Søren Enemark

Aningaasanut Inuussutissarsiornermullu min.
Umiartornermut aqutsisoqarfik j.nr. 200808745

AU003671